



泛菴集 卷三六

應製縣 序

臨湖遺稿 七律  
五律  
七律  
五律  
雜著

翰

~ 16  
2408  
3



2408  
3-3



泛翁集卷之六

豐山洪柱國

應製錄

附賀箋課製



領議政鄭太和二度呈辭

不允批答

王若曰惟國家安危實在於輔相而已顧人臣  
進退亦觀其時勢如何試言今日之屯艱其將  
何術而弘濟天屢譴告若為享難謀之帝心歲  
比凶荒若為保子遺之民命百為潰裂了無整  
頓之期衆瘼因循莫施剗革之策不知何掾禍  
亂伏於冥冥每勗凡我臣工無然世世幸老成  
之置諸左右賴匡救而圖厥始終惟卿莘闕邁

泛翁集

卷下

於韋平盛業追於韓富承文翼餘烈尙有典刑  
相 仁孝累朝俾輔寡昧勤勞蓋久二十年之  
經綸倚毗益深大小事之咨訪名高姚相豈特  
救時之才望愜東山咸服鎮物之量整紳笏而  
不動聲色應機務則若決江河燥濕辛甘罔不  
歸於調劑謨猷區畫動必合於便宜伊前後之  
設施綽然有裕故中外之想望久而不衰實藉  
扶持之功尙保枕隍之勢方當有為之會朝夕  
與謀不料巧閑之章再三而至夙夜匪懈縱榮  
衛之乍愆休戚與同奚去就之便決新陽漸煦

庶便將攝之方昔疾宜蘇可獲神明之佑雖莫  
恤小子之虛行獨不念 先后之恩私顧以山  
林難進之賢猶且強起矧在股肱相須之義其  
忍遽歸於戲盡瘁鞠躬方得真宰相體先憂後  
樂可見古君子心毋爲釋負之圖庸副如湯之  
望

教江原監司李後山書

王若曰四國分釐之職固任大而責隆一時簡  
寄之方或內輕而外重乃輟地部之佐庸畀藩  
臬之權貽彼藏貊遺墟爲今關嶺重鎮類周京

之東陝屏蔽畿封居漢都之上游轉運漕道然  
幅員僅八百餘里而郡邑纔二十六官野少曠  
多既異中區之寬敞入稀土瘠莫供上賦之豐  
腴僻隅蕭條峒戶罕耕桑之盛遐陬斥鹵海氓  
但魚鹽之饒屬緣比歲連凶慘見沿海尤酷死  
亡迭罹於饑疫含生之類孑遺蓄儲俱罄於公  
私施賑之力殆盡不有撫摩之實惠衆瘼奚蘇  
不有振舉之良籌積弊奚革凡條一張而一弛  
當審不緩而不苛膺是責者惟艱諒非人則莫  
可惟卿風神凝重器識淵弘以謹厚自持而其

守則確乎難拔以謙退自牧而其用則綽然有  
餘故自 累朝以來克著歷試之效置臺閣則  
匪躬蹇蹇領州府則游刃恢恢掌喉舌之封牋  
出納惟允參省曹之判牘通敏可觀自海湖而  
轉關屢典方面而前後之為政蔚有治聲方當  
訖外庸之辰適值缺東伯之會既三按於諸路  
縱軫獨賢今再命於茲邦蓋循僉舉茲授卿江  
原道觀察使卿其仰體予意益殫乃猷究民生  
利病之源施設宜急考守宰明幽之績黜陟必  
公興學校勸稼農治化之攸本整紀綱敦風俗

政事之當先詰戎備而無踈虞慎獄訟而無冤枉其他策應經理惟在商量乃若稟處專裁可  
遵常典於戲重臨棠舍不改坐憇之陰復巡桐鄉猶留卧治之化卿應熟諳於前度予豈多詰於此行

教摠戎使金壽興書

王若曰近者摠戎之缺也屢易而難其人今乃待卿而授之僉舉而有是命新兼節制式宣綵綸惟卿以名祖孫稱難兄弟再鳴科第入望莫之或先一蹴卿班朝論不以為驟清規秀範匪

專於儒雅文華敏識英猷能該於綜理幹辦故試地部之劇務足見天賦之通才哀閔三年方喜昔疾之今愈忠殫一節行賴長策之復施惟茲十乘之權實為三輔之帥若唐之神策龍武環衛宸居統漢之馮翊扶風捍蔽京邑第緣時事之枳陞馴致武備之廢隳倘值警急於不虞何以得力苟非教練之有豫難可即戎屬予檢材誰膺閫外之師命念卿歷職夙諳畿內之軍情以保障南漢而可推其便宜以按察本道而可悉其大略卿宜有制置之美予是以簡在于

東茲授卿搃戎使卿其勉恢良圖無負重寄以  
卿慈惠而用蘇凋瘵之兵民以卿周詳而用繕  
踈虞之器械選部曲則期致固圉之效嚴約束  
則常如對壘之時雖云俎豆之習聞未學軍旅  
亦知功業之成就乃出書生於戲小范有膏裹  
甲兵寔全文武畢誠為禁中頗牧何異古今庶  
幾圖報於寡躬罔俾專美於往牒

教統制使申汝哲書

王若曰節制三方之權視他帥最重簡選諸將  
之列得其人尤難先定予衷果諧僉舉乃騰海

防閩臬咸摠水戰戎兵壯樓櫓於龍驤偵候潮  
汛雄組練於犀甲控引嶺湖用備島巒肇初壬  
辰以後不忘鉅鹿每念舜臣之賢如得將則賴  
虎豹在山之威倘有警則遏鯨鯢駭浪之勢第  
惟前後管轄之臣莫體朝廷委寄之意陰雨備  
缺蓋狃於宴安而不思綢繆魚鹽利饒或肆其  
誅求而不戒饕餮苟非奉公之忱節詎能得士  
之歡心惟卿壯志棄繻少年投筆會公名震大  
漠擬紹餘風乃祖功寇凌烟懼忝先烈故以將  
相之後早拔行伍之間佩州符而政始彰仗關

鉞而績益著惟其有歷試之效是以加陞擢之恩茲授卿三道統制使卿其殫乃忠猷欽予寵命軍卒氓獠之凋瘵者思所以煦濡器械鎮堡之踈虞者思所以完繕必審衆弊之緩急當有次第更張細究荒政之便宜奚止十二方略於戲荆南兵事悉以委於岑彭隴西家聲庶可追於李廣永絕東漁之患行寬南顧之憂橫海樓船豈但收功於揚僕建標銅柱罔俾專美於伏

教咸鏡監司南九萬書

王若曰專一州不咸欽大惠於上黨屬四岳有缺畀重寄於比門僉舉攸同予簡非偶惟卿端方其質溫雅其風政事文學兼之謂通才俱宜左右聲名標望迥然出流輩遍敷清華鯁直言諍臣風稜雍容真學士樣子權班資而司比斗出納允於夙宵由郎署而佐東銓甄拔公於前後長薇垣則盡補衮之責師國子則恢教育之方養以雄州李令伯之將母行何德政富彥國之賑民孝自移忠諒無出於誠恪儒能飾吏亦不踈於事功惟其悃悞無華安靜之化足尚所

以璽書增秩循良之績必褒賸彼咸鏡巨藩實  
是豐沛舊域 王跡之肇衣冠有月游之儀地  
勢之雄關嶺有天險之設第封疆逖矣政惠之  
未易沾伊習俗蠢然文教之未易化言風土之  
殊別則黑水靺鞨之相隣論物產之蕭條則滄  
溟漁採之是賴猾吏肆其橫斂而民力耗驕將  
狃於久安而戎務隳况值大侵之連仍忍言遐  
陬之凋瘵聞今秋失稔之慘殆甚前年想明春  
救荒之艱必倍他路顧朝家蠲省之小惠何能  
遍及顛連而按臣施措之便宜當有別樣料理

為任若是其重其理須得惟良茲授卿咸鏡道  
觀察使卿其持簡易而不煩率勤謹而無怠黜  
陟之典大明於守宰而俾有所勸懲休戚之源  
細究於黎黔而俾絕其愁怨若范滂之按冀北  
吏皆惴於澄清如韋丹之莅江西民不病於飢  
饉其餘衆弊因襲悉宜一切更張至於兩條稟  
裁可一遵成憲乃若七事勸課亦在勉行於戲自  
州而藩今進階於二品惟叔暨姪並按節於一  
時庶殫相助之忱迭報分陝之佳政益懋已試  
之績毋損治郡之賢名



鎮川縣百源書院 賜額祭文

提學李種學 贈祭議金德  
崇文學李畚校理李阜同享

高山景行士林攸師崇德象賢王化所基緬惟  
提學生值麗季胤胄稼收嘉訓有自蔚乎其文  
與學之博庶普厥施奈時溷濁不容何病纍于  
湖左炳然忠節竟為身禍有 贈侍郎孝原百  
行終始愛敬根於天性負米仲由攀栢王哀特  
召行殿 英廟禮優門閭掉楔存沒哀榮三綱  
一編昭揭芳名曰惟文學學是顯門深於大易  
性命之源胄筵講論冀我 仁宗契悟微言賢

聖相逢擬待他日將以大用天未欲治為世道  
慟有猗集賢已卯儒珍麗澤文正君子同寅悵  
贊王道俾 后堯舜運屬彙征志決遠引季鷹  
掛帆林宗超網見幾之際明哲足尚予懷風烈  
相感曠世恨不同時類俗是勵瞻彼南鄉有祠  
翼翼想像諸賢餘躅在即精靈所安不孤而隣  
吟紳頌義追慕彌新封章請額再籲忱誠茲遣  
禮官用薦醴牲不昧者存尚冀歆格華扁千秋  
過者必式

賜祭夏興君曹漢英文

昌寧之曹殿聲何猗忠貞忠景祖繼孫貽卿乃  
趾美抱負自奇 仁廟作士譽髦於斯議禮抗  
章卿實尸之三十魁科人以為選大闢進塗首  
界憲司志在激揚風裁獨持強隣迫脅廟議羈  
縻事有難從義士涕洟尊周一疏扶植倫彞懷  
慨忠憤寧恤身危俄罹禍撲為坵庭纍臨行  
錫貂慰諭恩慈西河李孫楚囚鍾儀矢操罕確  
不磷不緇萬死還朝芳譽益馳掌 王之教卿  
所優為草創潤色大放厥辭天郎儁望移自鳳  
池遍敷華臚兼翼明離中書起居東壁論思酬

勞史局緋玉其資繼垣首席并泮臯比司喉出  
納佐銓衡鍾暨試諸省于何不宜得君之重暫  
借 麾睠彼春州民口是碑予眷舊人念卿位  
卑尹京以擢按畿以治春官之亞典禮罔隳惟  
其頑頑謫亦或隨內省不疚卿則自夷暨論平  
生匪專文詞宏材博識素檢清規世勲之寵忠  
蓋是追宅相之傳廉白以遺歷事 三朝率是  
為基繫卿氣節 寧考深知隻字華袞餘可以  
推卿樞館閣佇期大施年未及耄病忽難醫遽  
以計告增予盡悲良臣凋盡喬木淒其寔稽舊

典替奠洞卮靈如不昧尚克歆茲

祈雨祭文

元始發生功責于神厥宅曰震厥德曰仁厥施  
斯普穀我生民節過東作膏澤胡屯麥靡有秋  
播種違辰靜思致災咎實誰因萬姓奚辜由予  
一人冀神陰隲大霈無垠

右勾芒氏

於赫炎靈長養是司平秩南訛寔惟其時因予  
失職亢旱至斯雲密旋散風淒益吹沃野揚塵  
良田坼龜失今不雨民靡孑遺澤物之功神實  
尸之亟賜一霈毋或少遲

右祝融氏

至厚明神持載功長配乾資生萬彙發揚云胡  
閱淫災極恒賜四郊如滌三農卒瘁苗枯於麥  
種失其秧無麥無秧民亦隨亡荷民滅類神必  
盡傷願垂甘靈蘇我八方

右后土氏

念德所職物成而收苟不生長亦安有秋終始  
粒民繫神之休于茲乾暵胡靳陰麻期行秉作  
望絕西疇早旣太甚民必盡劉皆由涼德抑係  
神羞庶鑑至誠靈貺是酬

右蓐收氏

后矣惟稷肇茲稼穡萬世永賴功利溥博胡寧  
瘖予亢旱此酷驕陽漸熾厚地皆坼間有小雲

止於霖霖車薪杯水何補枯涸民將靡遺神亦  
奚托尚冀感通沛然其澤 右后稷氏

用坎為德維址是位制火潤物陰切普被胡然  
降殃厥澤乃闕種不入土麥則枯矣靡神不舉  
無賴穆祀雲霓嗚望唯待神賜冥佑迨今猶可  
救止度垂靈液一霑千里 右文宣氏

大行大妃殿忠清道進 香祭文

蓋昔哲妃莫盛任姒為母為配其德至矣恭惟  
聖母遠嗣徽音壺則慈範乃姒乃任相門儲祥  
軒曜降精塞淵莊敬道叶坤貞 寧考初潛寤

寐好速視天作合百祿是遺樂以鐘鼓玉化之  
源丙丁徃事忍說西轅偕隨 朱邸淹質異域  
險艱備嘗寒暑屢易殷憂增益天亦悔禍東旋  
陟位儀並 震駕禮相主鬯誠助視膳逮 御  
中闡陰教益闡至道含章萬物資育亂臣邑姜  
良佐文德練衣昭儉簪珥寓警早夜謙畏恩絕  
私徑河洲摶木詩頌繼起十年贊治化自家始  
丹成軒鼎痛結梧山尊居長樂 文子承顏孝  
以國養三朝婉怡戒切流車樂在含飴方期萬  
壽遽至大漸虔禱靡文仙遊已奄臣民如喪哀

通窮谷仰想 嚴廬孺慕何極微稱紀實寔稼  
公議女中堯舜曠代齊美鬱彼驪岡真宅卜新  
緬禮甫訖厥衛又陳事若有待感勸彌增神理  
所安邦慶可徵遺澤在人及世何忘令聞千秋  
彤管流芳伏念臣身縻藩寄跡阻庭哭辨香緘  
悲替薦菲薄

大殿誕日百官賀箋

五百年生聖載回電繞之辰八千歲為春恭獻  
嵩呼之祝叢霄瑞色匝地歡聲恭惟 主上殿  
下道懋執中功臻建極體元育物茂啓亨泰之

期歛福錫民咸躋仁壽之域茲當震夙之節益  
膺昌熾之休伏念臣等叨廁鵷班獲伸燕賀進  
金鑑之錄願效忠規贊玉衡之治思殫瓊力

世子冊封後百官賀 大殿箋

一索衍慶誕屆勝衣之齡 貳極正名載舉頒  
冊之典謳歌八域蹈舞羣工恭惟 主上殿下  
鴻烈光前燕謨貽後念元嗣之丕責豫養冲年  
稽 累朝之寶章肆加顯號茲誠 宗社之福  
豈但家國之休伏念臣等叨際昌辰獲逢盛事  
瞻岐嶷之奇表爭頌重暉想喜悅之 聖心齊

獻萬壽

神德王后祔廟後百官賀 大殿箋

事有詩吟追隆肇舉累百年之闕典禮無憾於  
升配獲親 第一室之祔儀望協神人慶關

宗社恭惟 主上殿下孝光善繼業盛丕承體

列聖未伸之心爰尊 太母奉萬世不祧之饗

克備彝章情文兩盡於明禋福祿益迓於陰騭

伏念臣等幸際昌運叨忝具僚執邊豆而趨蹌

繞謁 清廟瞻黻冕而舞蹈齊賀 昕庭

慈殿惠候平復後百官賀 大殿箋

色憂彌日久值 慈候之愆冥佑自天幸親至

誠之感慶關 宗社歡溢臣隣恭惟 主上殿

下光紹丕基祗奉 聖母孝源百行咸囿錫類

之休誠盡三朝常勤問豎之禮茲當侍疾有喜

益迓降福無疆伏念臣等忝在具僚獲際昌運

瞻 東朝之瑞氣蹈舞惟均覲 北極之耿光

忱悃自激

代顧榮送張翰歸江東序 以下月課  
壬寅秋居首

張舍人松姿擢秀奇意鬱於青霞冰操含清爽

韻襲於丹壑陳元龍之淮海豪氣不除仲長統

之田園閑情自在宵中曠度共稱今世步兵身  
後浮名都輸卽時杯酒欣逢青眼乍聞琴於舟  
中薄遊紅塵頓拄笏於幕裏高標混俗世路劇  
於羊腸傲骨妨時宦情薄於蟬翼雲蘿入夢故  
山之石室嵯峨井梧驚秋旅舍之金風颯爽前  
明後智有自得之神機今是昨非慕先獲之逸  
軌心堅介石非六丁之能回志次歸田豈三公  
之可易投腰間之短綬於我浮雲理江上之孤  
蓬不俟終日寰區多難處濁世而馬求君子見  
幾笑衆人之不識道合舒卷不管蕉鹿之浮榮

意適行休非爲尊鱸之清興超然世網郭林宗  
之高蹤邈矣仙舟李元禮之行色冥冥黃鵠不  
作稍梁之謀皎皎白駒肯受苗藿之繫于時銀  
塘露濕浩蟬吟雨林樾寒玉宇霜浮獨鴈叫而  
汀臯晚塵纓乍濯停撓攬曲渚之蘭祖席初移  
鼓柁向別浦之樹瞻吳山之暮色不如歸意之  
濃溯剡溪之急流方識退身之勇若余者結交  
親於同郡出處幸類於當時慨閑忙之殊途仙  
凡便隔於此日布帆無恙徒羨浩然之行羽扇  
虛搖漫起歸歎之歎閭門見月應勞千里之思

洛橋停雲可無一言之贈欲採南山之蕨預報  
故人將掛東門之冠倘容逋客

擬桃源人送漁翁出洞序

丁未冬  
居首

嗟夫象外棲真吾已分於遐道人間有累君不  
肯乎又留則知採藥天台劉郎迷再入之路回  
槎河漢張公杳更到之期是用悵會面之難恒  
乃遵歧路傷分手之何遽聊餞十言于時落日  
歸雲催移祖席飛花流水徐引行舟於是紫芝  
可餐贈以商老之曲滄浪可濯和以漁父之歌  
塵袂摻來不禁瞻竚之恨俗緣磨盡亦惱離別

之愁一宿依然能無桑下之戀重尋邈矣倘憶  
橘中之歡若余等隔風雨於塵寰任他角上蠻  
觸依烟霞於石室占得壺裏乾坤樵爛孤柯世  
變經六百歲桃栽萬樹子結待二千年今日逢  
人却是晉代之客當時避地尚餘秦室之民間  
消息於鄉間徒然起感抒情言於樽俎何以駐  
行根未洗於真源去將安適跡已秘於靈洞歸  
莫浪傳所冀初平牧羊倘遇叱石之處令威化  
鶴相期訪柱之辰

耆英會序 已酉冬



嗟夫人生百歲躋老耄者固稀上友一鄉稱賢  
善者蓋寡然則仁而有壽者為最貴德而不孤  
者為尤難而况官仍顯隆兼之以冠冕之盛趣  
復蕭散濟之以田里之閑者哉睠茲洛中專美  
海內方修禊於粉社別初會於槐庭乃若韓路  
國兩公豈非天下大老其餘七十歲諸彥摠是  
地上真仙倣故事於香山但取優逸追前躅於  
睢岸寸微芳徽功存鼎彝乞骸之風節落落位  
忘樽俎尚齒之氣象熙熙高名仰北斗之標壽  
曜振南極之彩蒼顏白髮怡悅獻酬之間烏几

鳩筇安便起居之際意在真率寧酒餼之或豐  
名以耆英須年德之必備顧其風可謂淳矣預  
是宴亦云榮焉于時太簇司辰勾芒戒序條風  
入律碧池漾漣漪之波淑景舒暉青陸煽氤氳  
之氣名園華刹挹古都之風烟水竹林亭媚新  
春之物色馳襟懷於曠朗幽興何窮流睇眇於  
微茫清賞不歇於是秉明燭而繼晷飛淥觴而  
促巡醉不亂之謨猶遵魯訓樂無荒之諷且戒  
周詩不佞人有尊三我未能一占小園而獨樂  
幸接芳隣得廣廈而俱歡叨陪勝集齒未及於

法苑珠林  
先軫跡反躡於後塵徒懷廁席之慚猥承授簡  
之命輝煌盛事縱有圖畫之流傳寂寥短章若  
為紀述之稱塞所冀願神益健履道彌康南陌  
東阡永擬周旋於杖屨良辰羨景恒願頌祝於  
杯筵

擬漢封張良留侯制 戊申冬

皇帝若曰莫與爭能宜有非常之典以此封若  
庸副克讓之忱豈曰報功蓋為適願惟卿以韓  
五相之後居漢三傑之中贊朕機謀決勝美於  
千里賴卿規畫成大業於八年肆當庸建之辰

乃有自擇之命策崇勲而昇雄邑是乃朕心辭  
全齊而請陳留可見卿意一千年之遭遇實肇  
茲邦三萬戶之殷饒不願他域此殆天授也昔  
相感於風雲仍其地封之今共盟於帶礪茲以  
卿封為留侯於戲卿事朕自許伊呂朕視卿不  
比韓彭盡化為王顧功烈豈在其亞各從其志  
而爵位非所當論往卽乃封欽此朕命

擬宋田錫謝褒以朕之汲黯表 癸卯秋  
居首

諫職久曠茂效無隱之誠恩獎特隆猥叨非常  
之典何比於是自知不如伏念臣忠悃由中魯

法集  
材居下憂治世明主只緣天性之樸愚舉極諫  
直言妄陳時政之得失纔紆糾繩之責荐荷華  
袞之褒尚論古人如黷近矣不借異代惟朕嘉  
之蓋其甚艱之資或不多讓至於遺直之譽曷  
堪並稱徒感過詡之殊榮敢擬追配於曩哲千  
餘歲世相後得與齊名一介臣技無他恐難副  
實諫諍風采考往牒而增慙知遇恩私在今日  
而為盛若為企及無以承當伏遇皇帝陛下導  
之使言褒所以勸想凜烈之直氣恨不同時垂  
品藻之溫音及於賤物臣敢不得君如彼與古

為徒勉其不能罔俾專美有漢希之則是庶幾  
見賢思齊

擬燧人氏臣民謝教人火食表 庚戌夏

民去古未遠愧存抃飲之風人非火不生欣被  
教食之化室家相慶饗殮而治伏念臣等際大  
朴時循太儉俗踵前朝之食實尚昧炊爨之謀  
襲上世之茹毛不識烹飪之節嗟無厚生之樂  
思致觀文之休何圖地二之神功寔資眾萬之  
利用莫不飲食鮮能知其味之人爰有君師教  
之以相養之道取巽木之炎火熟而薦之新鼎

龜之調和雜其嘉矣良由先得我所嗜也是謂  
能盡人之性焉日中之食不遑可想勤苦之聖  
念天下之口相似普慰飢渴之羣情草具之惡  
何憂芻豢之美可悅伏遇我后以結繩政代有  
巢基順五行咸適其宜功高肇創與百姓遂同  
其樂恩洽博施臣等敢不食以爲天待而舉火  
使民養生無憾皆仰王道之先舍哺鼓腹而歌  
庶頌帝力何有

擬古演連珠

臣聞志士處世不以少康而忘憂危賢臣愛君

不以至聖而無箴戒是以尺疏治安之策非因  
漢文之業衰丹書敬怠之謨豈爲周武之德薄

一

臣聞烈士有志於抗節豈待知遇之恩明主推  
誠於求賢必著感應之效是以國家板蕩之際  
不識何狀而有真卿山野胥靡之中乃審厥像  
而得良弼

三

臣聞圖天下之業者謀既臧而博詢建皇極之  
功者德之崇而勉學是以高祖屈羣策豈乏智

法苑珠林  
慮之淵深大禹惜寸陰非歎資質之睿聖

法苑珠林  
泛翁集卷之六終

泛翁洪公詩稿若干  
卷副子萬選士亦為  
昌協所定仍命綴為  
語其以余惟公自少  
為詩已為先軍名公

所亟賞又多尤富先  
生必為序稱述甚備  
以待朱子為重獨記  
昔年先王于肅文衡  
日每考次法學士月

課詩公所作輒在萬  
中昌協時尚少竊從  
徇窺視則已知公為  
能詩人及後見公於  
伯氏文懿公茅其容

貌無所矜飾口若不  
能為辭冲然而已矣  
退而激於人益知公  
平生恬靖自守不喜  
交游朝謁之外即為

閑居凡吟咏終日亦  
自乐而已初不勤立  
名任詩人為不朽以  
之未於是不唯以公  
為人因亦得其所以

為詩名蓋如此嗚呼  
此蓋世之馳騫榮利  
終身徂而徒事粉  
墨塗抹以詩自名者  
以哉邈公晚罹禍籍

益自肆於江海間跋  
宕觴詠以迄其志公  
凡世之榮辱口喪益  
無所入於其心而詩  
名益昌蓋其句律精



工而意度優閑描寫  
真切而興寄冲遠讀  
之猶若見其把酒高  
吟冥心事物之外詩  
可以觀立不佞哉公

於月沙李公為外孫  
又少學於鄭疇翁其  
淵源浸淫志矣然其  
深造自得多出於天  
機以一時詞林三如

法苑珠林卷之三  
公聲稱亦有出公上  
者矣至於古人風致  
則殆莫能先公而世  
欣未能盡知也蓋公  
善於自晦而然耶抑

以真知之難雖詩名  
亦然也古人有云文  
章如精金美玉自有  
定價是集之行必當  
有具眼者鑒定其品

泛翁集  
余故不究論云歲舍  
丁丑仲冬上澣安東  
後人金昌協溼壽

泛翁集附錄

通政大夫禮曹叅議知製教洪公行狀  
公諱柱國字國卿其先安東府之豐山縣人鼻  
祖高麗國學直學諱之慶生都僉議舍人諱侃  
以文章名世世稱洪厓先生坐直諫貶東萊縣  
令卒于官舍人子諱有孫諱演連世為大提學  
其後六傳而有諱履祥司憲府大司憲 贈領  
議政號慕堂以經術德行爲 宣廟朝名臣是  
公之祖考也考諱霽禮曹叅判 贈領議政妣  
貞敬夫人延安李氏左議政月沙文忠公諱廷

龜之女公以 天啓癸亥九月十九日生自幼  
儁偉不羣歲重寡言笑先輩見者皆以遠大期  
之聰悟勤學每獨坐潛心對卷雖有喧聒之  
聲若無聞焉稍長詞藻溢發出遊泮宮聲譽藹  
蔚十六舉司馬初試覆試亦居高等以卷有違  
格誦乙酉丁外艱戚易俱盡戊子中上舍選考  
官奇其作始欲置第一名適又卷中一字誤犯  
御諱例當黜而仍置下等蓋深惜之也乙未丁  
內艱禮如前喪庚子除冰庫別檢供職十餘日  
乃歎曰升斗之俸雖可救十口饑安能懷刺折

腰於官長門乎遂棄之壬寅擢文科權知承文  
院副正字出補連原察訪明年薦拜承政院注  
書俄以病遽甲辰復拜與承旨有相避遽乙巳  
復拜以月課連三次居首陞授成均館典籍蓋  
自 仁廟朝以後以是蒙 恩典者只四人而  
公其一也遷司憲府持平兵曹佐郎俱以僚嫌  
遽為直講時選部郎且有相避二歲不他遷丙  
午選知製 教丁未春今 上春宮冊禮初行  
妙簡僚屬首拜公侍講院文學俄移持平辭遽  
由騎省又拜持平上疏請懋聖學親賢臣擇師

保輔 儲貳開言路崇禮節戒翫遊嚴 宮闈  
其言皆剴切而時 顯廟待近宗甚厚近宗恃  
恩出入無嚴公憂之特甚以壞堂陞啓邪徑為  
辭持謙先君子常言此疏當為近來封事第一  
尋移司書出拜咸鏡北道評事為當時極選也  
踰年以弘文館修撰召還移司諫院正言辭遽  
還副修撰自是至癸丑長處三司春坊七拜修  
撰四拜校理再為副應教為持平掌令者一拜  
執義者三拜兼弼善輔德者二拜司諫者一遞  
堂憲府例付直講司成者又各二間為宗簿

寺掌樂院太僕寺等正公性喜懶散每除拜輒  
引疾免多不供職而當官遇事未嘗不盡言其  
為掌令 顯廟將浴溫泉 慈殿 中殿並行  
而獨 大王大妃殿留京闕公上疏諫曰昔唐  
宗將幸九成宮御史馬周言太上皇春秋已高  
陛下宜朝夕視膳九成去京師三百里溫清之  
禮竊有所未安也今茲溫宮雖與九成有異而  
三殿並幸乃其時所無之事 大王大妃奉養  
其將屬之何人見者躡之在玉堂隨例講讀之  
外因文寓諷多所箴規每遇災異與同僚拜劄

論時政失得憲官嘗有疏斥大臣者 顯廟怒  
下之理館僚陳劄救解 天怒益激命並拿公  
獨上劄救益力又上疏爭之疏入八十日始下  
其後銓司擬臺省輒 命改入宰臣有以言事  
被 特命補外臺官爭執一日再啓 顯廟命  
罷其臺官並罪承旨捧入者公與同僚劄論又  
甚切每侍 胄筵竭誠開導所陳說皆勸戒之  
語而尤拳拳於孝敬之道焉 寧陵遷奉時為  
都廳役完以勞進通政階拜禮曹叅議甲寅春  
仁宣大妃昇遐與長貳議奏 慈懿殿服暮年

既而覺其誤改奏大功 顯廟可其奏而以奏  
差違 命儀曹堂上並拿問及置對見釋由工  
曹叅議出為安邊府使時一邊樂禍者蝟起將  
以禮論螿上林陰嶺南無賴子投疏斥功制  
非宜 顯廟盛怒令復議諸議臣或竄或待罪  
時事大變復下公等于廷尉公到官未旬日還  
就理無何 顯廟賓天今 上嗣服金吾始奏  
當編 高陽居數月 特宥仍又 命叙而  
公素不喜仕宦  
常欲買田江湖間以自放於耕釣而未就也至

是自杏洲謫居沂上西湖之竹里借人江榭而  
住者數年嘯詠江山悠然自得雖家人未嘗見  
隕穫鬱悒之色家素貧自放廢窮轉甚麤糲不  
給而處之晏如每語人曰余以不才荷 國恩  
踐華顯躋銀緋於分已過遇坎而止固其所也  
升沉得喪豈足以介於心况清閑之境夙余所  
願而未得者乃於今得之其視奔馳於軟塵之  
間者又豈可同日道哉及告 廟之論發用事  
者以己亥之灾暮服甲寅之奏功制堦爲前後  
罪首禍且不測而公坦然無所撓戊午除富平

府使辭病不赴罷己未秋除安岳縣監三以狀  
求罷不得 朝旨催迫毘勉以赴而意甚不樂  
既至官約已以潔莅下以靜政清如水四境晏  
然庚申三月有使臣自燕歸者出迎於黃岡是  
月初六日在站館忽中風疾卒于旅次年五十  
八方伯與二三傍邑宰治喪走人取遺衣來只  
弊衣數稱觀者歎其寒素計聞 上教曰洪某  
不意身死予甚驚慄曾經侍從之臣不可無顧  
恤之道其令本道題給喪需又 命沿路發夫  
送喪皆異數也邑民聞公喪莫不呱呱泣涕諸

孤奉櫬而歸無論儒生以至武士掾史各禱哭甚哀葬地去邑數百里而遙至有輓粟相役者公嘗戒諸孤曰葬祭之儀並從省約勿求挽勿用蜜果諸孤遵治命行之公天姿秀曠襟韻清遠篤於孝友早喪怙恃終身哀慕事長公文懿公及長姊如父母焉文懿公亦甚愛公日夕怡怡以盡天倫樂事久堂朴尚書長遠習知之心常嘉歎嘗贈詩曰以我識真長多君事伯康仲兄藝而天嘗作詩寓哀內兄青湖李尚書一相見之泫然泣下曰情見于詞自能感人撫愛

諸孤姪出於至誠性伉高不肯藉人汲引足未嘗踏權要門見人汲汲馳逐事交游者輒為之顰蹙今相國文谷金公壽恒嘗遇公特厚文懿公勸令一往謝而以其方秉銓嫌不造其簡重自守類是又常惡世人好雌黃為媒進階持論務為中直絕無矯激所處一室如斗環以書史公退靜坐終日諷詠自娛門無塵雜平生不問家有無裘葛不具簞瓢常屢空焉喜酒遇輒引滿一觴一詠方其任懷得意融然遠寄而亦不失常度至於聲色芬華泊然無所好在吐幕經



歲粉黛滿前未嘗一眴人以為難今大司諫沈  
公攸素與公善又同罹世網相從於江干又知  
公深公沒為文述行義甚詳其略有曰氣節是  
元祐完名文章卽長慶風調雅性不樂榮進息  
交絕游有同藏世之人時逢同志評騭詩文之  
外未嘗臧否人物蹤跡不躡要津棲遲每思一  
壑及異論橫生禍機叵測中心隱然有斯世之  
憂而憂色不掛眉端醉輒瞪目不語傲睨萬物  
之表如遺世獨立者挹其氣象自是磊落人也  
於此足以槩公平生而亦可見公能自超然於

榮辱亨屯之際者矣噫公友愛之行恬冲之志  
峻潔之資平曠之度為人所重如此而霜臺一  
疏言人所難言其為 國家慮至深向使其說  
得行則奸萌可絕而變故亦不作矣公歿未二  
十日近宗謀逆誅知公者皆服公高識而悲其  
溘然不得復見用也其為詩濡毫立就畫出真  
境格高意暢尤長於步韻酬唱雖至累十疊不  
窮駢儷亦清麗有徐庾法前後應製居首凡十  
六一時同列以詞翰名者皆自以為不及少從  
畸翁鄭公弘溟學鄭公亟稱其才舅氏白洲李

公明漢嘗見泮製賦驚曰詩固所能不意詞賦  
又得楚人遺調鶴谷洪相公瑞鳳嘗許之以他  
日主盟騷壇東溟鄭公斗卿見公址闕所爲詩  
大加稱歎所著詩文十二卷藏于家公之在杏  
洲也儕友呼爲杏洲移竹里又呼爲竹里後將  
移往苔山又有以苔山呼者公笑曰我棲息未  
定如泛宅焉仍自號以泛翁云始以庚申七月  
二十五日葬于豐德松山里將以某年月日改  
葬于揚州豐壤之縣倉里卯向原夫人德水李  
氏吏曹判書諱景曾之女有二男六女萬選進

士萬迪進士狀元女長適李涑次沈冲次金濡  
進士次趙正萬進士狀元次鄭壽崑次沈鳳輝  
內外孫男女若干人持謙自少出入公門深慕  
公雅操有素進士兄弟以狀見屬且言先人常  
謂不肖等曰人或爲父母誇大行業題墓道一  
言浮實便致人笑仍誦權石洲忠州心歌歎其  
激切今不肖錄先人事蹟懼或一毫有溢辭不  
敢盡叙遺徽狀若銘願得實而不華者文以無  
負先志持謙於此益深敬歎不獲以固陋辭謹  
据家狀且叅以平昔所觀聞論撰如右以竢立

言君子之採擇焉

通政大夫弘文館副提學知製教兼經

筵叅贊官春秋館修撰官成均館大司成趙

持謙撰

墓碣銘并序

洪國卿之胤萬選嘗來授余以狀余觀其冠履  
應制哀戚由衷余已知其稱家兒又其狀曰先  
君惡碑碣之溢美者故其狀皆據實蹟嗚呼國  
卿賢乎哉然余與國卿顯廟時出入筵席  
服其文學操履知國卿賢非直今日也國卿生

於天啓癸亥九月十九日時世道回泰運氣  
清明公之所稟受可知又公以慕堂月沙為內  
外祗其尚類也宜矣公在壯角以詞詩代儕流  
亦為先進大家流所稱許咸以為衣鉢之傳有  
在也既成進士闡大科歷踐華顯多在玉堂春  
訪其輔導論思必出於正嘗上疏論為治以懋  
聖學親賢臣為要道又以擇師保輔翼儲貳  
為急務因言受善之量未弘使臣之禮未盡而  
其下又爭親閱武士之失未及敦宗之道  
而深以堂陛漸壞宮禁不嚴為戒皆指陳事情

不為空言而其敦宗一欵卒為上禍階梯至於  
楚獄之成而益驗焉掌令時以疏切諫溫宮之  
七十曰昔唐宗將幸九成宮御史馬周諫曰太上  
言春秋已高陛下宜朝夕視膳九成去京師三  
日里溫清之禮竊有所未安也今茲溫宮雖與  
九成有異而三殿並行大王大妃奉養其  
將屬之何人聞者竦然危怖憲官有疏斥大臣  
忤旨削黜繼而並諫者廷尉問公以應教獨  
上劄救解又以疏申之疏入八十日始下田是  
屢擬臺閣輒命改正其後遇事益爭論不已

經席進講之際或因文義或因古事委曲以歸  
之上躬及時政令上在春宮顯廟妙簡  
僚屬公首膺是選以為冲年訓迪尤當以格言  
至論盈耳充腹故竭誠開陳而尤拳拳於孝敬  
之說間嘗略為外職而皆未久久帶三字銜凡  
所述作脫口而膾炙於人前後魁課製者十六  
又嘗連三次居首特陞品秩蓋自仁廟以後  
獲蒙是恩者只四人而公其一也仁宣大妃  
國恤以禮曹叅議依古禮請慈懿殿大功九  
月服因被幸禍者構誣久罹錮籍今上已承

始起廢為安岳縣監屢以狀求免 上特旨催  
使交事公赴任六朔而出候使臣卒遇疾以庚  
申三月六日竟至公館復噫泰運先幾 聖化  
將新而遽至於斯豈非天哉 上聞甚加驚悼  
特庀其終事公早孤哀事兄姊如父母嘗有仲  
氏哀辭見者不覺淚濕性喜清貧不立產業蕭  
然斗屋疏糲不給又常恬靜自守惡世之諛詡  
徵逐以故其官位猶有歎焉公蓋有推而與之  
之意矣人有愧於先之者豈所謂古井無波者  
非耶嗚呼以公之文學詞華宜鳴 國家之盛

而遭時不淑既不能與中華大雅上下其酬唱  
此知公者之所以重為嗟唏也然觀公之志亦  
不以人之所以惜之者自惜而常有逡巡却步  
之意焉公於是又豈不加入一等矣乎惟甲寅  
乙卯間一番士類創殘流離且加以無將罪名  
大禍匪朝伊夕而公悠然坦蕩若不聞也寄傲  
江湖獨立萬物之表公可謂塵埃中鶴骨也哉  
父堂於公長遠孝友篤至氣類相感嘗以詩稱  
慕而一時推尚交遊皆是文行修潔之士古語  
云不見其山但見草木此亦可以論公世矣今

上初服公已擯斥而特念胄筮時誠意哀榮備至亦不可謂不遇矣豐德松山卽公寓墳地將以某年月日改葬于楊州豐壤之縣倉里卯向原公嘗有遺戒諸子遵奉喪祭務從節約亦足以矯俗弊矣公諱柱國號泛翁豐山人上祖之慶麗朝文科狀元官國學直學自後軒冕蟬聯中世稍不振至慕堂公始大顯諱履祥以經術德行爲 宣廟朝名臣考諱寔文科禮曹參判夫人德水李氏吏曹判書景曾女男長卽萬選進士次萬迪進士狀元六女適李凍沈冲金濡

進士趙正萬進士狀元鄭壽崑沈鳳輝孫男女皆幼公伯氏文懿公諱柱元尚義好士以余之不有其家而辱與友焉余故知公尤稔今又爲公二述此文而系以銘公有遺集十二卷藏于家公之詩始主於選而晚好長慶晦翁嘗評詩以爲變不可易言然此李柱之所不免詩得如李杜亦可以止矣然詩可以論公也哉銘曰  
鷓鴣下地志千仞 鷓鴣空嚇翔欲迅 全我  
五章返紫皇 德輝今辰傷永藏 吾誰與歸  
厚夜長

大臣輔國崇祿大夫領中樞府事致仕奉朝  
賀宋時烈撰

墓誌銘并序

公諱柱國字國卿籍豐山鼻祖高麗直學諱之  
慶其後蟬聯為世甲族祖諱履祥司憲府大司  
憲 贈領議政號慕堂以經術德行為 宣廟  
朝名臣章甫有俎豆享于故居考諱靈禮曹叅  
判 贈領議政妣延安李氏左議政文忠公月  
沙諱廷龜之女公以天啓癸亥歲生戊子成進  
士庚子除冰庫別檢供職旬餘自免壬寅擢文

科補承文院副正字自連原察訪薦拜承政院  
注書乙巳以三魁月課陞授成均館典籍自是  
在騎省為佐郎在諫院為正言司諫在憲府為  
持平掌令執義在國子為直講司成在春坊為  
司書文學兼弼善輔德在玉堂為副修撰修撰  
校理副應教選為知製 教出為咸鏡北道評  
事間為宗簿寺掌樂院司僕寺正而其於春坊  
三司一職或再三或六七拜癸丑遷 寧陵以  
都廳勞加階拜禮曹叅議富 仁宣后喪本曹  
定 慈懿殿服暮年既而改奏大功 顯廟可

其奏而以稽遲並長貳下理置對釋由工曹叅  
議出安邊府使適嶺南無賴子投䟽言功制非  
宜公復坐就理而 顯廟賓天今 上嗣服始  
奏當配高陽居數月 特宥繼下叙命而禮網  
遂為世禍朝廷不復收公戊午始除富平府使  
引病不赴己未除安岳縣監三以狀求罷不得  
黽勉赴任迎使臣自燕歸者于黃岡瘁得疾不  
起于旅館實庚申三月六日也事聞 上驚悼  
所以哀卹之者出例初葬于豐德地以丙子十  
月二十日改葬于揚州豐壤之縣倉里卯向原

配德水李氏吏曹判書景曾之女有二男長萬  
選進士尙州牧使次萬迪文科司諫院正言六  
女適李凍郡守沈冲金濡進士趙正萬進士狀  
元庶尹鄭壽崑監役沈鳳輝萬選以萬迪長男  
重九為後萬迪次男重五重一李凍男秉淵生  
負奉事秉成進士沈冲男弼賢金濡男秉翼進  
士叅奉東弼文科說書鄭壽崑男道恒道益沈  
鳳輝男聖希進士賢希女孫及曾玄多不悉記  
公容止凝重襟懷曠遠與羣居寡言笑早喪怙  
恃終身哀慕事伯氏文懿公及長姊視父母焉



一室如斗環以圖史靜坐終日吟誦不輟而不問家有無見人游談微逐者則未嘗不為之顰蹙於文辭最長於詩有瀏瀏風調至於步韻酬唱濡毫立就雖累十疊不窮駢儷之語亦清麗有徐庾法在儒冠前輩皆以主盟文苑許之及釋褐應製凡居魁十六一時操觚者皆自以為不及職在侍從十餘年不備補拾則持風憲不入經席則侍 冑筵其隨事獻替因文規諷切時政而裨 聖德固多矣若以其關於大體者言之 顯廟待近宗甚厚出入無嚴有恃恩

驕恣之漸公上疏以壞堂陞啓移還為言見者稱其憂微以為封事第一 顯廟將浴溫泉慈殿中殿並幸而 慈懿殿獨留京闕公又上疏引馬周諫九成之行者為言見者稱其愛君以為無愧古人且自持甚嚴雖平日交親素相許與者職居要津則未嘗一還往在比幕經歲粉黛滿前未嘗一顧眴人皆以為難公雅有丘壑之志而貧不辦買山之資及畸於時寓居西湖之竹里者數年頗以償宿願為幸嘯詠江山悠然有自得之趣及去 廟論發當事者指甲

寅之奏功制為極罪大禍將及而公亦坦然無  
撓雖家人未嘗見言色有異於常者公自遷謫  
以後易居者數三親友輒隨所住為號公笑曰  
我棲息未定如泛宅焉因自號以泛翁云所著  
詩章雜文若干卷藏于家余於公年則後而仕  
則先幼不得隨肩於筆研之間長不得接武於  
班聯之次然艷聞其文行慕往者深及余叨社  
臬教文實出公手而今公一胤又以公誌幽  
之文托余慨念今昔為之一涕不敢固辭叙而  
系之銘曰

居家孝且友立朝忠且直 其聞亦已多  
猶未極 十年游禁林官序躋貂玉 其位亦  
已榮高蜚猶未足 樂靜而惡動專裏而簡褻  
不急於進取不詘於隕獲 文章可自娛身  
名諒無愆 此重則彼輕何忻又何戚 其後  
且有人委以未盡食 余與公作銘藏之於幽  
宅 雖知其文陋自幸無愧色

大匡輔國崇祿大夫原任議政府領議政兼  
領 經筵弘文館藝文館春秋館觀象監事  
世子師南九萬撰

墓表

公諱柱國字國卿世籍豐山大父履祥有經術  
德行為大司憲 宣祖時父靈禮曹叅判母延  
安李氏文忠公廷龜女 仁祖癸亥生公偶偉  
不羣詞藻早成戊子中進士 顯宗壬寅登第  
肄槐院明年授注書乙巳用館課三魁陞典籍  
自此八九年間兩司至司諫執義春坊玉堂至  
輔德副應教選為知製 教出為北道兵馬評  
事間歷諸寺正癸丑 寧陵遷用董事勞進階  
為禮曹叅議甲寅 仁宣大妃薨與長貳議定

大王大妃服大功後有投疏訐其議者 顯宗  
怒罪禮官公以安邊府使就獄今 上初論配  
高陽數月 特宥戊午除富平府使不赴己未  
除安岳縣監又辭不得庚申三月六日卒于黃  
川之旅館事聞 上驚悼哀恤踰例葬在楊州  
豐壤之縣倉里卯向原公素習懶散不喜榮進  
每除拜多疾免而當官亦未嘗不盡言為特平  
疏論八事其一嚴宮闈時麟坪諸子出入禁中  
恃 恩驕恣憂其終啓邪逕指陳無諱趙公復  
陽稱近來封事第一為掌令時 顯宗奉 大

法苑珠林  
妃幸溫泉而中宮亦從獨大王大妃留京  
闕公疏引馬周諫幸九成宮事為言為應教時  
憲官以言事繫獄館僚劄救並下理公繼之力  
爭疏入八十日始下自後擬臺省輒命改其  
他隨事獻替引經諷切又非一二亢高自持遠  
聲色簡交游絕意世好觴詠以為適當欲買田  
江湖自放耕釣而貧不能就及解謫籍僑寄江  
上蕭散自得雖疏糲不給而處之晏然為詩濡  
毫立就凡有步韻酬和至累十不窮而警拔不  
俗駢語亦清麗少時前輩諸公多所期許及游

館閣同列操觚者皆自視以為不及也晚以棲  
息未定自號泛翁有遺集十二卷藏于家夫人  
德水李氏吏曹判書景曾女世堂於公有並世  
之幸而公既簡高余又拙廢蓋未嘗獲從容款  
好到老而有餘恨焉今公之二子萬選萬迪來  
求文表公之墓得公平生始詳向所恨者益深  
顧淺陋之辭不足少發公光輝是以力辭而卒  
不獲略為叙次云

崇政大夫行吏曹判書兼知經筵事弘文  
館提學朴世堂謹識



墳山圖記

孝子奉先之思無窮已矣既擇其宅兆而安之  
 矣刻石紀事以昭其懿義又埋銘幽隧為千百  
 年計則其為丘墓表揚永固之地者備矣而其  
 思猶無窮已焉則又為之紀載山川位置之詳  
 書諸策而貽來嗣使久遠之後按之而可識其  
 處雖使石有時而泐陵谷有時而堙變寧有不  
 得辨且識之憂哉故禮曹叅議泛翁洪公衣履  
 之藏在揚州治東豐壤故縣倉里卯向之原  
 胤子牧使公士中氏持憲君士吉夙夜竭力改

擇是原營治樹碣刻公事行手植松擇買田其  
下於墓道事織鉅靡不具矣又以公墳山圖俾  
余為之記蓋將以載之于公文集中永以眎遠  
也嗚呼其奉先之思誠無窮已矣余嘗拜公墓  
覽其山原鬱紆翕然而風氣聚焉則知其為吉  
阡今按其圖揚州之東有注葉山山下 光陵  
在焉其山一支南迤十餘里為柘峴自峴南去  
數百步一山陡起名城山有古城遺址自城山  
負亥東落南轉數節有小石峯又東折數節立  
金星峯而開斯區焉卜墓之岡正據一局之中

央也其東而遠則天磨普通諸山蒼翠浮天掛  
蘿峴在其間址而近則泉岫山山有貴墓松檜  
鬱然傍有九理峯障蔽左麓之低處 太祖大  
王行宮舊基在東址二里至今 御氣悅有觀  
於川原之間麥連坪巨野在東一牛鳴地通達  
經之即走嘉平抱川道也大川自址逶迤而來  
朝于墓山湯行縈迴而南為玉山灘出洞少南  
百許步層壁峙而俯臨川流雜樹翳翳登心石  
三字刻于巖越數岡東南二里雙樹驛村也墓  
傍東址百餘步縣倉也西北距州治三十里西

距都城東門四十五里碣石豎于墓東南三十  
一步丙舍在東九十步扁以永思牧使公兄弟  
所留止也泛翁公以儒雅進厚召文苑之望壽  
位不稱其德而遺集將永世而流傳則斯記也  
庶幾其隨之而不泯矣

丁亥仲冬下浣中表姪達城徐宗泰謹書

泛翁集附錄終

### 臨湖遺稿序

不佞自少喜譚詩其  
在正兒農山殿之側從  
容揚扆焉不列乎  
磨選先此舉名家敵

炳於百幸以來者此  
之是實不副名則獨  
取夫 吹翁洪公有  
風人韻致而頗愜生  
初不大鳴於是以一

時月朝未足為千古  
殿窮而冲素恬退  
人固如是存德於取  
名也 公沒幾年家  
藏久閱之其長



臣請道和  
士中氏體去遺急  
一味遠巡以嘗就人  
而丹鉛者則凡經百  
刪子法而後今始入  
梓于義城於皇之

季若士吉甫殺公  
遂疑心者十詩什附  
刊以行以書來回於  
名後曰吾弟有才無  
年而遂使去煙晦

不揚則為其久者何  
忍唯此殘編斷續  
其尚足存乎抑笑人  
唾點則不如在也願  
決於子之一言不佞試

取而用之以為回吟咀  
已喜其調圓律諧  
靡所怙滯而至其持  
情寫意宛約有雅態  
妙致如三日浦一律

興寄清迥難以掩  
暎碧紗於迷即丹  
書之側之無愧色有  
詩如此方可使埋沒  
牙為凌範謝固亦在

多也在詩家無失在  
色於以篇在免餘宵  
况友如是足矣即在  
存日名心是誇術於  
人其心冲素家典刑

居士吉自在童子出  
後王驚其長老心工  
徐庚體擅舉藉去  
然其困躓場屋殆三  
剛而三禱之矣何天

之嚮亨途大闢則輒  
卷勿辭世嗟其命窮  
至此存之既名休明發  
之無心曠徹則又益  
可悲此固士中氏所

為切之而有未自信  
於殘編者也然文  
章自有定價男一窈  
執咎焉矣且若歌者  
能使繼聲一應於石

者久益播於友心  
泛為之冲遠韻度而  
仍之士吉恬雅風味  
其作述有妙小大同  
工兩世鼓吹為黃鐘

臨湖遺稿附  
豐山洪萬迪士吉著

五言絕句

池萍

南風萍吐去  
北風萍南去  
恰似世間人  
往來無定處

記道傍所見

澗水浮花出  
山家何處春  
應知深峽裏  
亦有種桃人

偃蓋一盤松  
童童臨道左  
繁陰厚如屋  
行旅時來坐

臨湖遺稿附  
附  
八

士中氏於此勿復返  
抑不揚而有名可白  
巡鳥可笑已丑仲春  
安東金昌翁序

蕭條數峒戶隱隱依巖麓峽裏少平田燒山種  
黍粟

叢林鬱相樛四月雪未消行人度澗壑卧木日  
成橋

祀梓生深谷千年老且死世上無匠石嗟我終  
見棄

玉流洞

深澗石槎牙激波徘徊舞幽洞與澄潭前者復  
回顧

江上

江上逆風生篙人急下席力弱不勝舟流到牛

川曲

題采蓮圖

荷花似人面荷葉似人衣黃昏易相失攜手與  
同歸

金城途中

峽雪猶含凍巖花未放春行行入澗谷十里不  
逢人

三巖

下巖何窈窕白石平如掌俯見潭中影阿誰亦

倚杖

中巖稍奇壯亂水倒成瀑朝日照林樾紫烟生  
一谷

上巖轉幽邃丹壁與天齊流雲忽滿壑歸路使  
人迷

江行

潭石穩浮龜玉峯高聳鶴舟中一回首已失丹  
丘峽

來船遇上船船頭立相語君歸過我村報道平  
安去

忠州浣紗女手弄春江流齊唱竹枝曲遙遙望  
客舟

京商十二舶滿載延州離停橈問峽市鹽直近  
如何

朝發興元倉午過神勒寺今年春水多半日七  
十里

七言絕句

題畫

老樹槎牙亂石橫遠山殘照鴈邊明攜琴客去  
知渠興多在松間聽水聲



碧瀾渡

水國輕風響沆瀣碧瀾津畔暮招招舟中聽得  
篙師語此去江西未一潮

江西  
寺名

無題

春愁脉脉下樓遲燕舞鶯歌悵望時恨殺綠楊  
橋畔路也同歡意自多歧

羨陰尹氏亭次韻

尹家亭子羨湖濱層閣連雲制樣新在費一生  
經紀力百年登眺屬行人

發泉甘驛

山圍四面路如窮回轉山腰路却通山外又山  
山不盡我行終日在山中

登嶺望海

微茫一氣眼中漫天水相涵不見端此海東頭  
何世界鯤岑應作極西看

明波驛次李文叔寅炳韻

極目平蕪見驛餘海門朝旭隱深霞蹇驢未熟  
鳴沙路踏破汀頭萬點花

百川橋

蒼松夾路洞門開未上籃輿興已催何事百川

醉清道和  
橋下水却辭仙境出山來

妙吉祥石佛

蒼巖百尺細磨礮丈六真形是懶翁千劫此身  
長現在輪回不藉世尊功

漁人

南湖明月採魚還門外輕舸繫綠灣幾被風濤  
漂海去自言三見鬱陵山

掠庫

承流亂碓列溪傍春去春來盡日忙笑殺山僧  
還積穀不知松葉是渠糧

鳴淵

穿林決石亂川奔瀉落深淵日夜喧君看萬派  
山中水百折終歸洞一門

鳴沙

鳴玉晴沙繚海隈沙頭微雨海棠開依然一夜  
西湖雪更著逋仙千樹梅

觀日出次崔簡易韻

曙色蒼蒼天地東火龍擎上一輪紅人間幾箇  
奇男子虛老金烏出沒中

送堂姪士式重措省其內舅老峯閣相公

於碧潼謫所

城南小晤送征轅客路東風柳欲繁不識關山  
深雪裏陽春亦到逐臣門

別李仲剛

健命燕行時因歲凶乞未  
清國遣謝使

冠蓋西馳到薊門感懷何處駐征轅清風萬古  
灤河廟尚有當年恥粟魂

出門

昨日尋幽醉水村今朝約伴向蘆原床前小子  
牽衣語新歲阿翁數出門

別李判尹光夏兄燕行

迢遶燕山萬里程塞天風雪若為行臨歧不忍  
輕分手齒髮蕭然似我兄李兄即伯  
氏同庚

次禹僉樞

弘成回榻宴韻

慈恩寺裏首重回六十年來又此杯閱歷滄桑  
餘魯殿看花同伴盡泉臺

李河陽

坪挽

刻苦工夫太史家半生鈿髮鬢先華誰知起早  
明光手但植河陽一縣花

大殿春帖字

寒退天門霽景開乍看溝柳妬宮梅春噓物茁

陽和澤盡自吾王一念來

別金天用 致龍燕行

送子今年又遠征 剡風遼雪若為行 當時枉惜  
龍灣別約到龍灣 未半程天用饒

五言律詩

款款庵

窈窕開深洞 幽庵寄翠微 松盤雙鶴宿 林靜一  
僧歸 流水學人語 白雲生我衣 蒲團談妙偈 頓  
覺發清機

還虛谷庵贈大機大機即

出世同花甲 留山共竹房 人皆遊火宅 爾獨上  
慈航 妙法唯參柏 歸心却戀桑 明朝虎溪路 應  
笑我行忙

雙成湖

十里平湖水 輕風捲綠莎 海棠朝盡發 山雨夜  
應多 曝鱉時登石 遊魚自打波 隣船有商女 齊  
唱采菱歌

安養庵

老釋門常掩蒲團 絕點塵深棲一間 屋安養百  
年身 曲沼臨為鏡 飛花藉作茵 東臺久延佇 山

意欲留人

妙吉祥

古刹何年廢猶傳妙吉祥  
荒林埋短塔老木卧  
頽墻寂寞人天會  
淒涼龍象場  
唯餘舊時鴿  
來去語斜陽

毗盧峯

獨立蓬萊頂茫茫  
天地間東南惟有海  
西北更無山  
自覺胸襟壯何曾造化開  
可憐秦漢帝徒得夢中琴

白華庵庵廢無僧

廢寺人誰過  
寥寥草色春碑殘  
半没字竈毀尚餘薪  
古殿無燈燭荒林有鬼神  
蒲團調倦脚暫掃竹房塵

葛山

水驛連山店平郊  
細草蕪雨過諸澗響  
雲去一峯孤  
野徑行人少叢林恠鳥呼  
前程知幾許日日向東徂

李周卿世爽來訪携往仁慶水閣

喜君尋北巷携我度西村  
出入綠溪路徘徊  
憇洞門谷虛唯日澹  
天靜白松喧返策棲禽定蒼

月夜  
蒼遠色昏

寒食途中

病餘行役倦馱馬柳陰邊水白通潮浦春青種  
麥田山山寒食雨處處紙錢烟滿眼皆詩料詔  
華入短篇

別李得甫德成燕行

西踏龍灣迤南臨馬島遐山川猶左海旋節又  
中華朔野吞遼盡長城抱薊餘知君眼孔濶免  
笑大方家

李堂兄赤城別語

聞說寒風閣寥寥深峽中蒼生匣印漩烏下訟  
庭空對景只孤詠開樽誰與同何如南麓宅閒  
卧百花叢

慎勉哉懋挽

有羨人如玉玄翁許勉哉唯天均賦性何地不  
生才志業淹書卷身名老草萊一勝東海上魂  
魄倘歸來一勝勉  
哉亭名

尹吉甫憲柱慈堂挽

令胤曾同榻深知哲範存貧猶侈酒食老亦執  
蘋蘩未展升堂拜空懷剪髻恩落南違相締臨

挽倍聲吞

七言律詩

陽德院

陽德院前微雨時  
短僮羸馬客行遲  
塵蹊處處穿巖腹  
峒戶家家覆木皮  
日午山雞鳴樹上  
草平村犢放川湄  
桃源此去應非遠  
只是雲深世不知

姑峴次文叔韻

間關峽路幾時過  
不是踰山即渡河  
人面戴陽省漸黑  
馬蹄穿石響音偏  
多村膠太薄難成  
醉旅

枕恒寒易受病  
只是詩情猶未倦  
每當佳處輒吟哦

三日浦

澄湖泛泛木蘭船  
翠壁丹書尚宛然  
幽鳥不驚花外棹  
流雲如戲鏡中天  
誰曾入浦遊三日  
五畝移家度百年  
惆悵迷郎消息斷  
不妨呼我作神仙

萬景臺

獨上高臺最上頭  
杳然遐矚指三洲  
鯨波白日能飛雪  
蜃氣青空自作樓  
址望雲山何處盡  
東

來天地此中浮  
遙看極浦輕帆過  
莫是秦童採藥舟

洛山寺

尋真客意上樓忙  
徙倚危欄眼界長  
白雨過來天濶遠  
青山斷處海微茫  
觀音窟拆千年古  
義相臺高五月涼  
向晚水風吹霧盡  
好看朝旭湧扶桑

寒溪瀑布

烟生絕頂射朝暉  
忽見青天雨雲霏  
織女春機垂綳練  
鮫人夜室瀉珠璣  
雙庵東址靈源出一

壑中間怒沫飛  
模寫却嫌才力薄  
徐凝千古謾貽譏

松楸志感奉堂兄

孤村寒食雨初晴  
草樹丘原已向榮  
浮世幾年猶寄息  
故山佳節只吞聲  
音容永隔趨庭地  
懷抱聊憑省墓行  
想得惠連同此感  
祖江南畔拜新塋

曹表伯夏彥在道州寄詩問余北行次韻

答之

獨抱瑤琴欲待誰  
峨洋一曲隔鍾期  
前宵夢接



天涯面昨日梅開別後枝高趣豈求今世用寸  
心唯許故人知南雲尚恨歸鴻阻更耐明春吐  
去時

過麥厓

深峽春泥客路長黃昏又到古河傍陰生對起  
中開壑黑水斜迴上作梁絕棧懸空疑蜀道亂  
流衝石似瞿塘行人只說征途險不識名場有  
太行

敬次金華堂伯奉使到瀋陽寄惠韻

相思一夜鬢霜加心逐三韓使者車遼塞山川

何處盡剗門風雪去時多波聲鳴咽灤河廟劍  
氣低昂易水歌惆悵此行當此日大明天下竟  
誰家

次寄趙兄定而正萬

雲自無心鳥倦歸病夫棲息寄衡扉簾前好月  
來如約枕上青山夢不違閱世人情何太險閉  
門吾道未全非從君欲向蓬萊去千仞岡頭一  
振衣

隨伯氏會李蘊甫世玉莊次席上韻

西隣偶赴野人招佳會依然似昨朝雪護寒松

迷洞口雲扶殘日下山腰杯心竹葉初浮蟻屋  
角梅花已滿條不有主翁聯榻話客中羈抱若  
爲消

次李夢汝挺說韻

柳市南頭一徑微吾廬自與俗塵違東風門巷  
桐花發西日池塘燕子飛世路卽今開眼少琴  
絃從古賞音稀書樓昨夜烟蓑夢歸去春江水  
半磯

李相國尚真挽代述

白首蒼黃竄北荒向來忠節凜秋霜言同冲老

曾封疏地得齋翁舊謫鄉直道將看傳信又息  
褒無愧拜先王唯應一段純剛氣不異公身  
共在亡

永保亭

將軍樓閣出虛空三面臨湖氣勢雄清茶入簾  
山寺近晚潮平島海門通憑欄客在浮槎上搖  
艇人歸明鏡中千載翠翁留傑句至今霞鷺映  
紗籠

曠懷天半倚崔嵬極目青齊遠色開湖勢欲浮  
雙島去山形如戴一亭來轅門鼓角驚沙鳥滄

海樓船繫釣臺 聖代即今無警急  
元戎舊客日深杯

文殊寺次鄭季鴻維漸韻

危庵懸在白雲層 石窟深深俯碧泓  
斜日斷橋尋寺客 落花深院閉僧幽  
情却喜仙區遍病脚 猶堪絕頂登  
杖策又從獅子路 一聲清磬認中興

李會寧晚輝挽

山西豪氣出名門 超擢行間荷聖恩  
制閩威名曾繡鉞 分符惠澤幾朱幡  
金城未上將軍略

王壘先招僕射魂 姍姍故情偏掩泣  
春輝依舊吐堂堂

李季章寅辨在杆城寄示除夕一律次韻以謝

每憶前脩面發羞 雙丸催老劇相迺  
天公不必窮吾相 節物空教喚客愁  
萬事杯樽唯樂土 百年耕釣是良籌  
東溟浪跡何時返 霜雪應侵季子裘

尹體元以健丈挽

河南童籍及門人嚴謹蒼黃已巳春  
炎土水泉

添疾病暮年喪禍損心神 天書夢澤恩宣日  
客路藤陰夢斷辰飄泊旅魂何處托異鄉千里  
本無親

歸期屈指不旬餘急計先傳淚滿裾同閉幾年  
情款曲故人稚弟髮紛如詩篇索我關東錄顏  
面憑君嶺外書惆悵向來投轄地薤歌淒咽引  
靈車

金汝習灝挽

明時直氣屈長沙魂斷他鄉奈命何也是朝  
廷曾誤了不知天道亦非耶蕭森御史臺前栢

寂寞河陽縣裏花獨有故人中夜泣別詩題後  
又哀歌

尹都憲措挽代述

天品雍容地步優法門詩禮卽箕裘文山人策  
魁多士若水高情退急流自在秋花依老圃偶  
然風浪任虛舟十年離別仍長訣淚灑南雲憶  
舊遊

朗原君挽

縹緲樓居近紫微鳴珂春陌有光輝燕山幾整  
星馳駕 仙寢曾陪月出衣章疏嘉猷忠自篤

國朝詩林  
卷之三  
家庭孝行禮無違堂空最樂今誰樂緱嶺笙簫  
去不歸

李樂甫賀朝挽

上下郊亭一水湄晚年耕釣與君期  
差違李愿歸盤計同賦歐陽憶頴詩  
歷歷溪山猶似昨悽悽花石遠含悲  
佳城又卜東岡土過路那堪指點時

李判書世華挽

廉潔才猷姑捨馬向來忠節日星懸  
貞松獨秀嚴霜下良玉能全烈火前  
嶺海初還名益重

盧勇退志彌堅泉臺定有三臣會  
盛事須傳甲戌年

申兵使錄挽

學士門闌國士生向來朝論倚長城  
少時志氣班司馬晚歲功名李杜平  
治業縱殊書劍技托交恒篤笠車情  
仍思白首鵠原痛不復聯床夜雨聲

邵城次酬李子始聲

滿眼韶光著處同早春春事問園童  
山容頓變纔微雨柳意將舒已暖風  
萬事不求高枕外百

年宜送把杯中無端昨夜書樓夢鷓鴣晴波別  
浦東

空林烟火輞川同牛背斜陽返牧童老去客懷  
愁又病春來花信雨兼風紛紛榮辱皆身外落  
落交親少眼中世事卽今堪晦跡與君攜手隱  
墻東

又次子始

流落他鄉感歲年春光又屬上元天君投簪綬  
將休矣吾得菟裘歆老馬逸興病猶嫌廢酌高  
情窮亦耻言錢希夷最得安閒法千日蒲團穩

作眠

洪子翊禹翊挽

通明才器好心腸少日交情到老蒼論地與人  
宜王署自胡而嶺只銅章藤陰未喚長眠起桑  
井還驚短夢忙忍對君家觀察使白頭垂淚說  
存亡

季堂兄壽席次胤子重聖韻

夏木名園壽景天一門咸集闢芳筵靈根並茂  
椿萱色寶筭重迴癸卯年南極星臨鳩杖外蟠  
桃子結繡簾前秦樓壽席猶如昨遐衷君家自

世傳

蘆原庚申夜與蘊甫會

南村北巷盍簪頻相對樽前白髮新可惜數旬  
餘癸未不堪今夜又庚申山容默默猶含凍梅  
意妍妍早得春肯怕三虫能上訴老來元作少  
眠人

洪連山灑挽

唐城勲業耀麒麟餘慶門闌繼有人鄭老一樽  
時赴約蔣家三徑幸同隣風霜忽瘁喬林色挑  
李空留故縣春棊局子聲今寂寞每過虛閣涕

沾巾

文洪道原天叙文鵲山新榭韻

仙巖歸隱適心期攜得梅妻與鶴兒地勢依然  
盤谷序人烟宛似輞川詩栽花繞屋蜂棲檻引  
水通籬鷺立池養得金丹行滿鼎不須三秀羨  
靈芝

申相國琬挽

麟臺先業仰魁豪喬木門闌見鳳毛少日登瀛  
清議重明時調鼎上台高閒情世艷東山墅故  
意人懷范叔袍乘化九天應莞爾俯看平陸足

風濤

騎省夜會次韻

春寒惻惻逼深樽  
隣省朋簪盍一軒  
疎節肯嫌官長罵  
好懷聊與故人論  
時清政地為間局  
夜靜宮林似僻村  
白首郎潛吾不恨  
禁中佳會亦君恩

既離春坊又遞憲  
職喜而有賦寄李聖諧

明弼求和

疎才不合承明廬  
臺席元非懶性居  
已免官名來逼我  
都無俗事更關渠  
妻開藥篋藏朝服  
兒

拂塵床學古書天  
借此身閒世界南  
隣新釀問何如

李掌令世龜室內挽

尚書法訓在門楣  
名闕于歸婦則宜  
挽得鹿車隨處士  
買來猪肉教家兒  
誰知神劍相從日  
正屬雄藩孝養時  
彤管芳聲應不朽  
早聞姻黨說徽儀

七言排律

李相國世白挽代述

尚記籌司判牘時  
見公憂國每顰眉  
孤忠欲



挽顏波逝隻手思扶大厦鼓共向明時期盡瘁  
不知何恙遽濱危青山有力收精爽黃閣無人  
作羽儀忍說唐朝亡鑑痛不堪素卷輟卷悲公  
歸未了人間事朝野艱虞欲問誰

大蒐岐山陽

二十韻丁亥文臣  
試居第二

賜豹皮 庭

謨烈相承十葉昌周家蒼錄屬重光文宜有武  
皇猷備安不忘危睿筭長已喜威靈清海內更  
看師旅獵岐陽時當厭亂思治世天為扶顛啓  
聖王雲漢側身勤對越天威揚武拓封疆遺氓  
拭目歌鴻鴈荒服歸心貢鹿狼累世艱難回泰

運千年基業振頹綱中興功烈繩文武一代英  
豪集召方邦祚縱欣同木葉聖情猶復軫苞桑  
春蒐可做先王制日馭親臨大獵場駟馬前驅  
臨野曠鑿車徐駕卜辰良元知簡閱追前軌卽  
見車徒戒傲裝行似匪熊曾獵日地仍祥鳳舊  
鳴岡踰梁金鼓嚴師律接廟風雲整陣行七校  
揮戈禽虎豹三軍飛箭落鷺鷥詰戎已合三驅  
法載烈應同六月章毳後宏謨貽燕翼光前盛  
德戒禽荒彤弓詠後洪休並石鼓刊來偉績彰  
何幸 聖人生左海復看今日御春塘周宣遺

臣元道才  
五言古詩  
範思追配授簡微臣敢贊襄

五言古詩

贈金兄伯雨濡星州省觀之行

遊子出門去川路紆而復驅車適何上白雲在  
遙嶺斑斕五色衣去去趨定省條風日以暄東  
閣春暉永州名子知否南極七星映稱觴上壽  
時挹彼樽中影

大澤蟄龍蟠中林病鶴偃幽人起遠懷緬思桃  
源隱之子告我行山川阻且速琴臺俯清流鳥  
道穿壘嶽東南六百里一覽雙脚健歸來幸說

我何山可隱遯

同柳集仲成運往賞南洞石假山文集仲

韻

人之愛萬物在真不在假恠底沈家山真山反  
居下岡巒重且復城市宛林野楓榭蔭其間爽  
氣無冬夏頭流割青鶴怙怙移白馬阿誰約我  
游柳侯真靜者逶迤越南陌行色自閒雅松壇  
露頂坐曠抱於焉瀉泠泠兩道泉日夜流不捨  
華山下居計倘此欲結社終然待人巧豈天所  
陶冶不如對南山悠然寄興也吾欲管吾說奈

此山靈啞

俞安邊命一挽代述

生別懷亦惡死別情何極哀哀俞大夫去上將  
何適侵晨柳車動松火照廣陌逶迤郭南門薤  
歌雜入哭悲哉此行色後會知何夕托交四十  
年終始意無斃論心白水清礪節朱絃直書窓  
共分光一燈明兩席依依廣陵野歷歷寺谷宅  
玉生眼前事俯仰成陳跡唯餘一段心不以爲  
明隔千秋九原下惘然應相燭  
或佩咸山符君爲鶴城伯君輕四百里訪我鈴

齋宿他鄉遇故人歡緒一何足中堂語清瑟曲  
欄橫長遂携君上高樓雲海極遠目傷心尹氏  
子別後見零落停杯說存亡哀淚雙雙滴樽前  
浪淘沙挽君歌一曲今春各投紱次第還京洛  
鬼伯自相促之子又冥漠回頭樂樓下大江流  
不息人生如斯夫一往何時復

雙栢亭梧陰尹相  
公故居

我遊雙栢亭相公之所築高名爛竹帛雅趣寄  
泉石層巖曲臺邊尚憶曾行處至今石間瀑淙  
淙似人語

鶴嶺瀑大木洞關添  
得二層瀑

我遊鶴嶺瀑匹練倒千尺奇觀異昔時洞壑新  
開拓人言往歲雨造物故有意始覺昔非遊遊  
乃於今始

李兄同甫喜朝女挽

延城有門相管濟而才美芳蘭始茁芽白壁遽  
墮水悽悽女挈銘惻惻澶娘誌從茲不忍讀短  
命一何似  
客歲趨東邸從臥葦晨昏不忍遠父母遲遲出  
重門那期數月別奄作殊方魂嗚呼不重見臨

絕有何言

白髮老爺孃撫棺血淚滋平生我憐汝今日汝  
為誰林間羨彼烏子母必相隨直待此生盡吾  
可忘吾悲

雪消廣陵山陽和燭氤氳陳芝與枯卉物物生  
意新玄扃獨自閉厚夜永無晨春歸人不歸孰  
云天地仁

前秋哭少女枕席尚涕淚哀哀父母心念之均  
彼此吾儕積何殃慘懺反逆理猶勝我家兒未  
并奄先死

雜著

福兒壙銘

福兒豐山洪萬迪第二女也祖曰禮曹參議柱  
 國曾祖曰禮曹參判靈高祖曰大司憲履祥母  
 月城李氏左議政慶億女兒以己巳閏三月九  
 日生顏端而豐有福氣命名以福稍長婉順仁  
 恕識事理愛父母友兄弟甚性恬然於物無所  
 欲祖母李夫人閔人多子孫眾獨稱兒最賢三  
 之子邑輒令兒隨歲甲申夏其母病瘟兒躬自  
 扶護竟染痛以蘇旋得毒痢至七月二十二日

不起吾與兒為父子者僅十六稔耳吁短哉始  
 名之日錫福而祝之謂兒必有享也及夫漸長  
 其賢日著又謂兒必不負所望也今乃未行而  
 先天此又何理然賢而早死如程孝女者自古  
 而然兒於天命何哉八月十六日葬于揚州豐  
 壤先塋側卯向原其父泣書此納諸壙庶幾後  
 之人哀其命惜其賢而毋毀夷其墳也銘曰  
 爾室之傍卜吾藏 骨肉千年同一岡 別短  
 聚長爾勿傷

金孝子旌閭讚 并序

嗚呼此孝子金公之間而我 聖上二十五年  
禮部以孝子行誼上聞 特命旌表者也孝子  
天性至孝幼時侍祖父病能盡誠敬人已奇之  
及長母任夫人病革抽刀斫一指血射藥碗見  
者無不動色逮至先尚書寢疾孝子日夜焦心  
衣不解帶出籲于醫入禱于廟以至嘗糞驗吉  
凶及鉅創哭擗哀毀吊者不忍見祁寒盛暑冠  
經一不去身朝夕祭奠泣涕至於爛薦形羸氣  
爍而猶不變薑桂竟以是不起卽禫前一日也  
噫噫悲夫夫孝子職也誰非人子誰不知爲子

者之當孝而滔滔叔季能子者鮮獨孝子生乎  
今世行出古人其至性純誠足以感動神明是  
宜受天之祐享有丕祉而卒乃無位無年天意  
孰究焉然能以一身立人紀樹風教將使人人  
者過孝子之間而聞孝子之凡則雖在千百代  
之下莫不油然而感發蹶然敬服咸一口道孝子  
不衰其視衆人之身享壽祿而名湮沒不稱能  
一時而不能千載者其得失何如也意者天意  
其在是歟余於是重有感焉孝子之曾王父大  
憲公光海時立大節世號爲忠臣今孝子又以

孝著聞夫忠與孝一致也忠臣孝子祖孫相望  
世濟其美芬芳人口則為孝子之子若孫而出  
入是間者其可不思所以自飭其身繼其家聲  
也耶今日修於家者即他日行於廷也今日孝  
於親者即他日忠於君也其勉之哉孝子名  
濡字伯雨於余為姊夫余故知孝子甚詳讚曰  
內盡其性非死孝耶外修其行非生孝耶兼性  
行而為死生孰若孝子之全孝耶煌煌棹楔表  
厥宅間有來千年人知為金孝子之居

與隣友書

夜閱六一集六一與梅君聖俞相約買田潁水  
上為攜手同歸之計有思穎詩曰優游琴酒逐  
漁釣上下林壑相攀躋及身强健始為樂莫待  
衰病須扶僞讀之至此竊感夫古人之事適有  
符於吾輩今日之志也余與吾子俱有維揚小  
築一朝浩然東歸則溪山林壑之勝漁釣琴酒  
之樂何遠不若潁水而思歸未歸鬢髮且欲白  
矣噫六一致位二府荷國重任其不能決然高  
舉勢或然矣吾輩郎署之任升斗之祿非有可  
戀而差池數十光陰至于衰老之境則向所謂

魚釣之樂林壑之勝皆將為身外事而有不能  
追逐攀躋者豈不可悲乎哉六一此詩成於四  
十四歲後五十二而不得歸有續思穎詩又後  
六十四而不得歸有思穎詩序衰老蹉跎之歎  
溢發於吟詠之間其有志未就虛度強健之日  
者豈不為六一之遺恨而吾輩之可戒處乎吾  
輩今年僅踰四十趁此強健早決歸計無復有  
五十二六十四之遲遲則平生事業雖不及於  
古人未老優閒庶不負乎初志不知當吾子意  
否茲步六一韻以呈不宣

祭壺谷南尚書

龍翼文

邦國將瘁哲人云亡樑木已摧小子安仰今吾  
哭公也私也儻天道是耶非耶惟靈錦繡肝腸  
圭璧姿質生偏邦而盡四海之壯觀碣石扶桑  
擢再第而進八座之崇班文衡冢宰文章即大  
曆餘脉自髫齡而已成氣節是元祐完名當晚  
歲而尤卓不料眉山文字之憂患未保晉公田  
野之優閒夜雨鬼門果驗服齋之舊夢楓林絕  
塞竟招鰲相之旅魂大澤龍亡狐狸號而鱗鱗  
舞遼陽鶴返城郭是而人民非几杖徒存雲山



寂寂風流已遠江漢滔滔不佞夙登高門誤辱  
虛獎雪梅山榭陪酒樽而周旋秋菊江村奉詩  
篇而酬唱撫往跡而歷歷在眼懷德音而默默  
摧腸嗚呼歸侍玉欄拜先王而何語流傳青  
簡揭後代而逾光在公何傷已超煩惱之域顧  
我奚適永違謦咳之音一聲長淖萬古永訣

送洪承旨受疇奉使燕京序

日輪南至星軺北徂已許大夫之賢勞豈作兒  
女之離別然而鄭詩留恨依依大路之遵楚歌  
動哀脉脉南浦之送况復人當暮境飲冰之役

何堪地隔殊方旋軫之期云邈是用攀征袂而  
不忍分手臨祖席而但自消魂洪令公大闕餘  
風清朝雅望詩書舊業韋玄成之一經翰墨高  
才鄭廣文之三絕金門曉漏幾越五夜之朝天  
銀渚仙槎又催八月之泛漢幾微不出於言面  
忠信可行於蠻夷於是辭鳳城向燕塞天寒占  
渡停車太子之河雪暗邊庭秣馬將軍之石清  
風如昨竹祠瞻伯夷之容白日無光柴市弔文  
山之節城郭是而人民已變山河異而風景不  
殊嗟呼殿廢文華千秋有攬涕之恨樓空白雪

四海無賞音之入朝京之舊路雖存華國之好  
手誰識則知玉館漫詠續名祖之遠遊遼店羈  
愁賴阿咸之相對於時關河寥廓漠漠而窮陰  
原野蕭條疎疎而冷雨行期與寒事相促客程  
共離緒俱長乃有親朋勗之以加餐騷客贈之  
以言志雖才慚金谷未追送遠之詩而意切陽  
關聊綴贖行之序

臨別遺稿終

己丑孟春

義城開列

